



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

***Komunikadu Imprensa
Tribunál Distritál Suai
07 Abril 2016***

Tribunál Distritál Suai kondena pena prizaun tinan 10 ba arguidu kazu abuzu seksuál ba menór

Iha 06 Abril 2016, Tribunál Distritál Suai kondena arguidu MdC ho pena tinan 10 iha prizaun tanba provadu prátika krime abuzu seksuál hasoru lezada ne'ebé sei tinan 7. Arguidu no lezada hela besik malu no nu'udar viziñu. Tribunál mós aplika kustu judisiál US\$50.00. Kazu ne'e akontese iha 09 Dezembru 2015, iha Distritu Ainaro.

Tribunál prova katak arguidu kaben nain no servisu nu'udar funsionáriu seguransa sivil bolu lezada ba nia kios laran, taka janela no odamatan, ho obrigatoriu kolu lezada nia ropa no komete abuzu seksuál hasoru lezada. Depois komete abuzu seksuál refere, arguidu dudu sai lezada ba liur.

Tribunál prova arguidu kontra artigu 177 (2) Kódigu Penal kona-ba prátika aktu seksuál relevante ho labarik ne'ebé seidauk tinan 14 ho moldura penal tinan 5 to'o 15 konjuga ho artigu 182 alinea. (1) letra (a) Kódigu Penál kona-ba agravasaun. Ne'e implica nia moldura penal agrava datoluk ida iha nia limite mínimu no máximu tanba vítima nia idade ki'ik liu tinan 12.

Tribunál prova faktu hirak ne'e, bazeia ba deklarasaun hosi arguidu ne'ebé konfesa totálmente faktu sira iha akuzasaun ministériu públiku, deklarasaun lezada no relatóriu médiku hosi Ospital Referal Ainaro ne'ebé relata katak iha duni '*kanek-ki'ik*' iha lezada nia orgaun seksuál.

“JSMP apresia desizaun tribunál nian ne'ebé kontinua lori autór krime violasaun seksuál hasoru menoridade sira ba iha prizaun. Desizaun sira hanesan ne'e bele eduka comunidade sira seluk atu hadok aan hosi hahalok krime ne'ebé fó impaktu negativu ba labarik sira nia futuru,”dehan Diretor Ezekutivu JSMP, Luis de Oliveira Sampaio.

JSMP kontinua, ezije ba tribunál sira hotu, atu mantein konsidera abuzu seksuál hasoru labarik nu'udar hahalok ne'ebé grave no ultrapasa hosi limite normal. Tanba ne'e tenke kondena ho pena masímu hodi haruka mensajen ba comunidade katak atitude hanesan sei hetan kastigu ne'ebé todan iha prizaun. JSMP mós husu ba tribunál sira atu kontinua kondena arguidu sira selu indemnizasaun sivil ba lezada, nu'udar forma reparasaun no rekoñesementu ida ba lezada nia sofrémentu.

Iha julgamentu antes, ministériu públiku husu ba tribunál atu kondena arguidu ho pena prizaun tinan 12. Entretantu parte defeza husu ba tribunál atu kondena arguidu ho pena prizaun tinan 8.

Kazu ne'e, rejista ho número prosesu : 52/pen/2016/TDS. Julgamentu prezide hosi Dr. Samuel da Costa Pacheco, representa juis koletivu. Ministériu Públiku representa hosi Dr. Matias Soares no arguidu hetan defeza hosi Dr. Manuel Amaral hosi Eskritóriu Defensória Públiku.

Atu hetan informasaun kle'an favor kontaktu direktamente

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org

Rua setubal, Colmera, Dili Timor Leste
PoBox: 275
Telefone: 3323883
www.jsmp.tl
info@jsmp.minihub.org
Facebook: www.facebook.com/timorleste.jsmp
Twitter: @JSMPtl